

# Tesalonike a zengât ekap zagâtņâ Paulonâ kulemgum zingip.

**Mâsop sot sâiwap den.**

**1** <sup>1</sup>Paulo, Siliwano sot Timoteo, nen Tesalonike kamânân kâmut ândie, zengât ekap zi kulemgum zingen. Ibâniņ Anutu sot Kembuniņâ Yesu Kristo, zet sot pâlâtâņ upme, zengât ekap zi kulemgum zingen.

<sup>2</sup>Anutu Ibâ sot Kembu Yesu Kristo, zikņâ tânzâņgoitâ um lumbe zengâren zimbap.

<sup>3</sup>Nen zengât op narâk dâp Anutugâren sâiwap sâmen. Yatâ oindâ nâņgâm pâlâtâņziņâ zo gwâlântesâmap. Oi buku orotņâ, zorâņ zengâren sambâlem zemap. Oi zorat Anutugâren sâiwap sâindâ dâp upap. <sup>4</sup>Oi um kâtik a, zen sâknam zingânetâ sâknamân ândim nâņgâm pâlâtâņziņ mân lorei kâtigem ândime. Nen zengât nâņgindâ âlip opmap. Oi zorat den siņgi kamân dâp Anutugât kâmut gakârâp dâzâņgomen.

**Kembu zâk hâuņangât den târârak sâm kwâkâbap.**

<sup>5</sup>Zen sâkziņan muyageziņgâmap, zorat itâ sâbi, “Anutuņâ den hâuņâ sâsâņ narâkņan kut ņâi patâ otningâbap, zorat dâp zi muyagiap.” Wangât, Anutuņâ zengât nâņgi dâp oi um topņan bagim ândibigât sâknam kwâkņan ândie, zorat. <sup>6</sup>Oi gâtâm Anutuņâ nâņgâm kubigi târârak ziap, zo yatâ otzingâbap. Sâknam zingâme, zen hâuņâ yatik sâknam zingâbap. <sup>7</sup>Narâk ziren Tesalonike a ambân, zen sâknam nâņgâme. Ka bet ko zen nen sot yatik sândukņan ândinat. Zo itâ muyagibap. Kembu Yesu, zâk sumbem a kâmut patâ imbaņâziņoot, zen sot sumbemân gâbâ gem gâi muyagibap. Narâk zoren yatâ otningâbap. <sup>8</sup>Zâk kârâp mem gem a Anutu mân nâņgâņangâme sot Kembu Yesugât siņgi âlip nâņgâm birâme, zen hâuņâ zingâbap. <sup>9</sup>A yatâ zo, zen Anutu mâteņan gâbâ kâbakņezingâne sâknamân geim Anutu imbaņangât âsakņâ mân ek ņâtâtigân ândim zâimambi. <sup>10</sup>Oi narâk zoren kâmut gakârâpņâ nenngâren âsakņâ

muyagibap. Oi a ambân zâkkâren nângâm pâlâtânj kwarâwe, zen aksik zâkkât nângâne imbanâ oi mâpâsibi. Zen den sâm muyagem dâzângowen, zo nângâm kwâtâtiwegât yatâ upi.

### Zen âlipziņ upigât Paulonâ ninâu sâip.

<sup>11</sup>Zorat zengât op narâk dâp itâ ninâu sâmen. Anutuniņâ zâk gâsuzingip dâp kubikziņgi ândibigât tânzângobap. Oi imbanâņandâ tânzângom kut ñâi ñâi âlipņâ nângâm, nângâm pâlâtângât nep bonņâ muyagibi. <sup>12</sup>Yatâ utnetâ Kembuniņâ Yesu Kristo, kot zorat âsakņâ zengâren âsagibap. Oi zengoot zâk sot pâlâtânj op âsakņoot upi. Zo Anutuniņâ sot Kembuniņâ Yesu Kristo, zikņâ tânzângoitâ yatâ âsageziņgâbap.

### A nâmbutņâ ziņâ den siņgi âlip birâne Yesu gâbap.

**2** <sup>1</sup>O bukurâpnâ, Kembuniņâ Yesu Kristo gâi mindum kândiangânatkât den dâzângua nângâne. <sup>2</sup>A nâmbutņâ, zen Kembugât narâk mârum gaap sâm Kaapumgâren sâm mândâbi. Zo a lâuziņandik sâm târokwapî mo ekap neņgâren gaap sâm mândâbi. Zo um gulip kwatziņgânam yatâ sâbi. Yatâ sânetâ kwakmak sot keņgât mân upi. <sup>3</sup>Sarâ den yatâ mo yatâ sâm um gulip kwatziņgâbegât galem orangâm ândibi. Kembugât narâkņâ mâte upâ sâi a doņbep patâņâ siņgi âlip birâbi. Oi Anutugât den kukuņ a imbanoot, zâkņâ muyagibap. A zo simân tâmbetagoapkât siņgi. <sup>4</sup>Zâkņâ zâizâiņj op Anutu sot kut ñâi ñâi aņâ mâpâsime, zo kâsa otziņgâbap. Oi Anutugât tirik namin zâi tâtatņan tap zikņangât sâbap, “Nâ Anutu.”

<sup>5</sup>Nâ mârum zengâren ga ândim zorat dâzângowan, zo nâņge. <sup>6</sup>Narâk ziren pâke ziap, zo nâņge. Pâke zo buņ oi zâkkât narâkņâ zo muyagibap. <sup>7-8</sup>Narâk ziren ko bâliņandâ tik nep tuumap. Oi mâtâp pâke kwap zo siriksâi Anutugât den kukuņ a, zo âsagibap.

### Sarâ imbanâ muyagibap.

<sup>9</sup>A zo Sataņņâ mam okņangâm imbanâ pindi kulem sot sen mârât sarâ topņâ topņâ tuubap. <sup>10</sup>Oi a nâmbutņâ den bon nângâm âlip orot zo birâm tâmbetagoagoņangât siņgi upme, zen bâliņandâ mem um gulip kwatziņgâbap. <sup>11</sup>A zen yatâ upmegât Anutuņâ sâi sarâ mamņâ muyagei sarâ denân pâlâtânj op mem ândibi. <sup>12</sup>Zo yen buņâ. Den bonņâ zo birâmņâ kut ñâi ñâi bâliņâ zorat âkņâlîme. A zo zen hâuņâ ziņgâbapkât yatâ muyagibap. Anutugât den kukuņ a zo âsagei Kembu Yesugât lâuņan gâbâ Kaapumņâ gamņâ tâmbetkubap. Yesu takâbap, narâk zoren gam tâmbetkubap.

### Kembugât den sot ninâu mân birâbi.

<sup>13</sup>Bukurâpniņ, zen Kembuņâ mârum buku otziņgâm gâsuzingip. Kaapumņâ um salek kwatziņgi den bonņâ mem ândim zâkkât siņgi

upigât sâip. Zorat âsâbârj zengât op Anutugâren sâiwap sâmen. <sup>14</sup>Zen yatâ upigât sâi den siŋgi âlip dâzângoindâ nângâm Kembuniŋâ Yesu Kristo, zâkkât neule âsakŋâ upigât diiziŋgip. <sup>15</sup>Zorat bukurâp, zen kâtigemŋâ den dâzângowen sot ekabân kulemgum ziŋgâwen, zo mem kâtigem ândibi.

<sup>16</sup>Kembuniŋâ Yesu Kristo zot Anutu Ibâniŋâ, zâkŋâ umŋâ gâsuniŋgâm umâlepŋangât op umâlep ziniŋ kâtik muyagem niŋgip. Oi bonŋâ biken minat, zorat nângâm um bâbâlaŋ op mambât ândinatkkât sâip. <sup>17</sup>Oi zâkŋâ umziŋ diim gem tânzângo nep âlip sot den âlip mem kâtigem kinbi.

### A ziŋ Paulo bekŋan mem ninâuŋâ tângubigât sâip.

**3** <sup>1</sup>O bukurâp, den ŋâi itâ ziap, zo nângânek. Nengât op ninâu sâne Kembugât den laŋ kârâm âibap. Oi zengâren kâtigem bon oip, zo yatik a zengâren op âibap. <sup>2</sup>Anutuŋâ galem otŋiŋi bâliŋ mâme a ziŋ mân nângobigât ninâu sâbi. A doŋbep zen Kembu mân nângâm pâlâtâŋ kwâkŋangâme, zorat.

<sup>3</sup>Ka Kembu zâk sâi kâtigemap, zâkŋâ galem otziŋgâm tânzângo bâliŋ mariŋandâ mân tâmbetzângobap. <sup>4</sup>Zen den dâzângoindâ nângâm lum ândimeŋâ ândibi. Nen Kembugât op zengât um zâgât mân upmen. <sup>5</sup>Kembuŋâ umziŋâ diigi Anutu umŋandâ gâsâzângomap, zo nângâm Kristoŋâ kâtigem ândeip, zo yatik kâtigem ândibi. Zen yatâ upigât ninâu sâmen.

### Konam a, zengât den.

<sup>6</sup>Bukurâp, Kembuniŋâ Yesu Kristo, zâkkât sâtkât dâzângoindâ nângânek. Osetziŋan gâbâ buku nâmbutŋâ nepziŋ tuum ândibigât dâzângowen. Den zo mân lum ândime. Zen konam a zo yatâ, zen sot mân ândibi. <sup>7</sup>Nen mâtâp topkwap lâŋâwen, zo yatik moliniŋgâbigât mân kwakse. Nen zen sot tapŋâ konam a mân urâwen. <sup>8</sup>Nen zengâren gâbâ nalem sângân buŋ mân nem ândiwen. Buŋâ. Kanpitâ mân kwatziŋgânam yatâ urâwen. Nalem sot sikumgât betŋâ muyaginatkkât sirâm ŋâtik nep tuum ândiwen. <sup>9</sup>Oi yatâ utnatkkât Kembuŋâ mân sâm niŋgip. Nep a nepŋâ tuumŋâ sângâm mimbap, zorâŋâ bâbâlaŋ. Ka nen zengâren yatâ mân urâwen. Zen niŋgitŋâ yatâ upigât yatâ urâwen. <sup>10</sup>Nen zen sot tap itâ dâzângowen, “Ŋâi zâk konam ândibap zo ko nalem mân pindâne nimbap.”

<sup>11</sup>Oi zi zengâren gâbâ den siŋgi itâ gâi nângâwen, “A nâmbutŋandâ nep birâm konam ândime. Zen nep mân tuum yen âim ga takâtakâ op den laŋ sâlâpkume.” <sup>12</sup>A yatâ zo, zen Kembu Yesu Kristogât sâtkât girem den itâ dâzângoindâ nângâbi. Zen uruŋsâm nepziŋ tuune bon oi ziŋan gâbâ mem nem ândibi.

<sup>13</sup>Bukurâp, zen ko âlipŋangât nep tuum ândim âkon mân upi. <sup>14</sup>Ekabân den zi kulemgum ziŋgen, zo a ŋâiŋâ biri topŋâ sâm muyagem

birâne zikɲik ândim aɲun upap. <sup>15</sup>Kâsa upigât mân san. Bukuniɲâ sâm buku okɲaɲgâm den girem dukubi.

<sup>16</sup>Kembu zâk lumbegât mariɲandâ lumbe muyageziɲgi narâk dâp, dâp op zimbap. Oi Kembuɲâ zen sot ândibap.

<sup>17</sup>Den nâmbutɲâ zo yen sa bukunâ ɲâiɲâ kulemguaɲ. Ka âkââkâɲan zi ko Paulo ninak bitnandâ simbup mem kelikmelik den zi kulemgum ziɲgan. Ekap kulemguman dâp yatâ opman.

<sup>18</sup>Kembuniɲâ Yesu Kristo, zâkɲâ tânzâɲgoi um lumbe zeɲgâren zem zimbap.

Zo yatik.